



17. uagust 2012

UKA 2012/174

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imattoq matumuuna saqqummiupparput:

Utoqqaat suli sulisinnaasut sulinerisigut utoqqalinersianit ilanngaanneqartarnerat naapertuunnersoq pillugu apeqquteqaat aallaavigalugu oqallinnissamik siunnersuut.

(Inatsisartunut Ilaasortat Siverth K. Heilmann aamma Knud Kristiansen, Atassut)

Tunngavilersuut:

Nunatsinni utoqqartavut sorpassuartigut suli atorfissaqartissavavut, pingartumik suliffeqarfipassuarni kinguariit nikinnerini siunnersortitut, immikkullu misilittagalittut pisariaqartinnejartuassapput.

Taamaattorli ukiut soraarninngornissamut anguneqartillugit amerlasuut qujaffigineqartarput, naak suli peqqillutik ukiorpaalunni sulisinnaagaluartut, sulerusukkaluartullu. Utoqqaallu amerlasuut saniatigut sulilaarsimatillugit utoqqalinersianit ilanngaanneqartarput, tamannalu aamma pissutaqaataalluinnarpoq utoqqarpassuit sulinerunissaminik sulilaartarnissamillu kajumikkaluartut sulinissaq ornigiunnaartarmassuk ilanngaassuunneqartarneq pissutigalugu.

Misissuinerit arlallit takutippaat, siunissami utoqqartavut marloriaatinngussasut. Tamanna aamma isumaqarpoq inuiaqatigiinni pilersuinermi isumassuinermilu isumagineqartussat amerleriassasut. ATASSUT-miillu isumaqarpugut tamanna sillimmartaarfigalugu inuiaqatigiittut piareersarfigisariaqaripput, aamma utoqqaat sulisinnaasut eqqarsaatigalugit.

Nunatsinni soraarninngornissamut aningaasanik ileqqaarneq ukiorparujussuunngitsut matuma siorna naliginnaasunngorpoq, pingartumik atorfait allat eqqarsaatigalugit. Taamaattumillu kinguariit arlai soraarninngornissamut annikitsuinnarnik katersaqarput.

ATASSUT-miillu oqariartutigissavarput ajornanngippat suliffeqarfinni amerlanerni soraarninngornissamut ileqqaarininnineq atuutsinneqassasoq, siunissamut eqqanaarinninnerummat.

Utoqqaat utoqqalinersiamit saniatigut sulinermikkut isertitaqartarneranni ilanngartuunneqartarnerat naapertuuppa? Siunissami qanoq utoqqaat isertitaasigut aalajangersaaffigineqarnissaat oqallisigissallugu ATASSUT-miit pingartutut isigaarput. Pingartumik siunissami qanittumi utoqqaat amerleriartussaaneri ilisimallugu ersarissumik politikkeqarfigineqarnissaat pisariaqarmat.